

# Christian Neivah

January - February, 2019

Lhani seh thuso



Private Circulation

## Kumthah 2019 ahung tai

Kum athah sunga ilut tengle aki kipah jie. Lhagao lam hinkhoa din vang ichom jong kih Lou toh abang jie. Kipa thanopna hi adeh in mihem tahsaphe lam dol ahi jie. Hi che jeh hin kumthah ijat hung lhung ta jongle lhagao hinkho lama kilha sam jep jep tobang in ikihe jiuve. Hijeh a hi, Mt. 6:33 in, nahinkho sungah Pathen leng gama lunglут masa penin, chule Pathenin nanga kona adei ho chu ipi pi ham geldoh jingin, chutengle Pathenin nahin peh-a pha asahjouse chu namu ding ahi, ati.

Hijeh chun tukum 2019 hin Pathenin eibol sah nom ho chu, ama dong jing pumin, alung lhaina din, tongu hite. Iti nahin leh Pathen na chunga kipah-a lunglhai ding ham, ti geldoh jingin. Hitia hinkho naman tengleh jing nikhoa din lungkham tapon nate (Mt.6:34). Ithepna, ihet na, ibol theina ho jouse, thilpha bolna inei-u angai-e.

Kum khat natehbe tai. Van noi leiset a gam atamjon January 1, nikho hi kum thah in amangui. China tea vang eiho Calendar dung jui in January 17-19 sung khu ahikha jie.

Japan a vang eiho Calendar January 1-3 sung khu ahi jie. Thailand gama kumthah hi, eiho Calendar dung jui in April 13-15 sung khu ahi jie. Hiche nikho le hin Thailand mi ten Buddha lim kitung ho asop theng jiuvin ahi. Bahai hou houho Calendar hi nikho 19 in lhakhat asemin, hijeh chun lha 19 chu kum khat ahi jie. Chule lha 18 leh 19 lhinna hoa nikho hi 19 sangin atam jep jie.

Vannoi gam phabep a vang New Year nikho hi achom chom ahi. Ajeh chu ama ama gam Calendar anei chom jiu jeh ahi. Vannoi gam atamjon vang eiho man Gregorian Calendar hi amangun ahi. Kum Thah nikho hi eihon, kisemphat jepna ni khon kinei leh aphi. Kum achesaa ibolkhel ho geldoh a, nungsun thei ho dalhah ngai ahi. Pathen lung lhai na akihol louva ahile hinkho hi panna bei ahi.

Twikul a twi tobang hinkho man lou ding ahi. Vadunga twi to bang hinkho man joh ding ahi. Vadung twi hi alhai lhai jengin, hijeh hin atheng thei-e. Alhai jing lou twi chu namse jia ahi. Pathen lungdei hol a tong jing ho chu vadung twi toh te kah ahi, athengin, ahoi in, atui in atah jingin ahi (Ezek. 36:22-32).

## Thina thei lampi ni

Pastor khat in pasal thahat tah, tahsa lentah khat henga Pathen thu asei peh ji vangin ama chun angai peh hih helin anahi. Ahinla nikhat hi ama henga, "Kithi leh itin tem?" tia adoh leh alungkot ahung kihong doh in, "Thi thu kahenga seihih in. Ken jong thi hi itoh abang dem, tia kana geljing ahi" ahinti. Chubanga kihat sah tah milen tah henga thi thu apat doh jou chun, anemdeh jeng in, alung ahop jengin ahi.

Jesun miho henga, kache mang vah ding ahitai. Nanghon neihol un natin, kachena muna nang ho hung jou pouvin nate. Nathonset nauvin natha gam diu ahi, atileh. Judah mi lamkai ho chun, ama chena eiho iche thei lou diu atina hi ama kithatgo khat ham, tin anasei uve. Jesun ahenguva, nangho hiche leiset a nahiuvan, keivang chung lama kona hung kahijoi. Keihi neitahsan lou-va ahile nathonset a nathi diu ahi, ati (John 8:21-24). Chonset in atha ho van gam lhung lou ahi.

Hikoma Jesun ama thina ding thudol asei hi, thina jat khat chu ahi, nahet chen hitam? Kachena ding keiman kahei, eihin solpa henga che ding kahi, atina ahi. Hijeh hin, Jesu din thi hi chemang kiti chu ahi, lei hinkho dalhah tina ahi, mun khat a kichon doh hetna ahi. Apa koma kile ding apa toh chengkhom ding ti na ahi. Achutileh thi hi kichat sanga, ngalel joh ding dan ahi. I-in dalhah

2 a khol la chea, inlama hung kile kit tobang chu ahi, kinem tah a ngalel ding joh ahi. Jesu jong chu apa koma kinunglea galhun loi ding ngahlela kinem jing khat ahitai. Jesu din thina hi Pa kom jotna ahi. Hijeh chun, cross a athi kon chun, Pa na khut a kalhagao kape tai, anati (Lk. 23:46). Hiti chun Jesun thina ana gingpon ahi. Tulai christian dihtah ho jong hi chutima chu ahi.

Jesun asei thina achom khat chu thina aninapa chu ahi. Hichu mi achenset in atha chu ahi. John 8:21 a Pharisee ho henga, nachonset a nathi diu ahi, tia asei hi melchih ute. Chonset in mi atha dia asei hi ipi chu ham? Old Testament a miphia louho chu thi diu ahi, tin ana kisei-e (Ezek. 3:18). Hiche hi jong chonset a thi ding thu ahi. Achensetna kihet doh louva thi ho chu kiseina ahi. Mi koi hijongle achenset in atom leh van gam amu lou ding ahi. Mi chonse chu Pathen ina cheng lou ding ahi. Hiche leiset a mihemte hi, athi jou hinkhoa hoilai alhun ding kimahet louse henga thi thu akisei leh akicha ji tauve. Athingam ji tapouve.

Mi athijou hinkho kisuh chet masat louse chu thi-nom lou, thi ngam lou ahi. Idia nachonset a nathi ding ham, idia nasumang ding chu namei ham, phaten kigelin. Na phat chompi lou ding ho chu kol chah sangin, donda le chun aphi. Amaho chu na nomanga, Hinna joh chu nakilhenna pha ahi. Gel phan!

Bible chang kipe masa a chun Jesun, keihi neitahsan louvu leh nachonset a nathi diu ahi, tin ana seitai. Chonset a thi kiti hi thudih, thu tah khat ahi. Chonset jeh a thi ho chu achonset a thia kisim ahi. Pakai Jesu thisana kisop theng ho vang chu, chonset thu achunga beh talou ahin, Pathen ina cheng ding ahi tauve. Jesun athisana asoptheng kitihohi Jesu tahsan ho chu kiseina ahi (1 Jn 1:7). Paul in, leiset dalhah loi a, Christa toh chenkhom ding kalha ngai joi, tin anasei tai (Phil. 1:23). Hijeh hin, Christa a hin-a, Christa a thi phapen ahi.

### **Jesu nuse teho thudol**

“Hichea pat hin, Jesu sejui tampi akinung leuvin, amatoh aki lhonle tapouve. Hichun Jesun somle ni jah a, nangho la nakinungle nom louvu ham, atile Simon Peter in, Pakai koi heng kabel diu ham, nangin tonsot hinna thu hijat nei-a” anati (John 6:66-67). Idia Jesu nungui tampil Jesu adalhah uva kinungle hitau vem? Idia amahon Jesu nung juitah lou ding atiu ham? Jesun ama hi hinna changlhah ahin, mihon aneh-u angai-e tia asei chuleh ama thisan mihon adonu angai-e, tia asei kit jeh a, mihon ahet them hih uva, Jesu adalhah lo-u ahitai.

Hinkho tahbeh ama koma aume, ama tilouva hinkho aumpoi, tin jong ana sei-e. Ama neilou ho chu athi ahi, tia jong asei ahi. “Asei

hi ahahsa behsek jenge, kon angai thei ding ham, atiuva anadalhah jeng -u ahi (John 6:60). Amahon hahsa anasah penu chu, Jesu tahsa neh chu hai, ahiloule athisan don chu ham? Thisan don kiti chu Judah ten adou mah ahi. Jesu thina bou chun miho hinna apeh diu ahi, tia asei chu hiding joh ham? Chonsetna vannoia hi cross a Jesu thinan, ngaidam leh kinepna miho apeh ding ahi, kiti chu adatmou hiding ham? Ahiloule Jesu in, ama hi Mose leh themgao ho chunglama um Pakai ahidan aphon doh jeh chu hiding ham? Gel te!

Akikhola chil chila ahileh, hiche ho jouse jeh ahi toh-e. Jesu thu seihi amahon apum het theilou ahitai. Ama thusei juinom ding koi jong ki-um tading ham, ahah behsek bouve, ti-hon akihou tauve. Jesun hichu ahen, amaho koma, hiche ho sanga khohjo jong aum nalai-e. Hichu hahsa nasah cheh diu ahi, tin ana sei-e (John 6:62). Amaho lung hop na chu Jesu ahenan, ajol pon, chule lhepbijong agopoi. Hijeh chun ama ho phabep in Jesu adalha tauve.

Sejui ho jong chun ahethem pouvin, ahinla Jesu anadalla deh pouve. Amaho lah-a Jesu thusei la theilou ana umnai, ahinla amahon, “Pakai, nang katahsan-ui” ti vang anasei pouve. Jesun asejuite henga chun, nanghon jong neidalhah diu hitam, tin anadonge. Amahon Jesu adalhah lou ding chu Jesu ahenan, asei juihon “Nangma henga tonsot

hinna aume, hijeh chun kadalhah lou diu nahi” ti asei doh nomu ahi, ti Jesun anahei. Midang ho chun athu alah theilou vangun, asei juiho chun ama henga hinna thu aum ahe uve. Simon Peter in Jesu henga, “Pakai, koi heng kabel diu ham? Nangin tonsot hinna thu hijat nei-a, chule Pathena hung kon atheng pa chu nahi kitahsana kiheta chu” ati (John 6:68). Jesua kona amuu thil chu mi adang koiman anei poi, ti amahon ana hechen ui. Peter in “Pathena hung kon athengpa chu nahi” tia asei hi aloi dangho khela asei ahi.

Hiche asei hi kicheh tah-a ahetdoh chu asei ahi. Ajeh chu ama man *verb* hi Greek pao thuchenga *perfect tense* ahi. ‘Pathena hung kon athengpa’ kiti thucheng hi agil ahi. Amahi tillana umsa tua jong umjing tina ahi. Hiche hin Jesu Pathen ahina jong aphondoh ahi.

Ahile, Jesu hi mi suboi bep ham? Ahiloule vana kon changlhah chu ham? Ahiloule thempu lhem khat ham? Pathen Chapa kihisah a ham? Hiche thudoh ho nadonbut na chun, nadin mun asei chet ding ahi. Tunin nang henga, ‘Nangman jong Jesu thusei nahet chen lou jeh a nadalhah nom hitam?’ kitile iti nadonbut dem? Jesu hi natahsan mong tah em, ahiloule hou-inna kaiji vanga adalha lah-a khat nahi ding ham? Itahsan kisuh chet phat ahitai. Phat anai tai, tonsot hinna dei jousen Jesu tahsan jeng hen.

### **Jesu Christa houbung khat**

Vannoia leiset a Jesu houbung khat seh hidia Jesun ana gon ahi. Ahinla tillai in missionary-a hung pang hon ama ama dei dol min chu atahsan ho anaput sah tauvin, tuhin suhgom abai tapoi. Ajeh hi theology jeh ahipon, ama ama houbung chonna ngai ho adalhah nom lou jeh-u ahi. Tahsanna lhongpi (doctrine) hi houbung jousea thakhat ahin, ahinla abahkai lamkai massa hon ama ama houbung phudoh ki vai pohna ding ana sem hou chu ki bang lou anahi.

Hijeh a hi houbung kipum khatna ding hithei louna hi masanga gam chom choma kona Pathen thu sei-a hung lut ho (missionary) jeh ahi, tia tulai-a kingoh ahi. Ahinla amaho chun mi Pathen housah ding bou anadoi-uva, khonunga houbung ho kipun khomna ding ana gelphah louvu ahijoi. Christian masa ho chun ama ama denomination bou chu van gam lhunna dana ana tahsan jengu ahi. Hijeh a hi, houbung ho khat a kivaipohna ding sumo hi adeh in ‘non-theological’ ahi.

Jesu houbung ho khat hisah na ding lung gelkhom sangin, khat in ki-umleh kamite kanam mite dia ipi phachom ding ham tijoh akihagel jotai. Tekah nan, houbung jouse pankhom a Haflong a college khat phu ding kitile Imphal lama cheng hon, keiho din aphachom poi, tin gelun tin panpi nom ponte.

Lai khat chun Nagaland a houbung khat in mi khat chu uisa aneh jeh in vet-in anakoi khan ahi. Christian hi-a Khaini, Dumchep, Cinema vet phalloi, phallou loi jong aki-ume. Hiti ho hin christian ho lah a khat le khat kitomona asosah jin ahi. Ki-punkhom na-a dalhah ding chonna ngai atam jin, akikhel ding jong atamin, chule hou natong ho lah a jong athaneina kikhel peh ding atam jin, hijeh hin houbung mipi ti louvin hou lamkai ho jengin jong asumo jiuvin ahi.

Geldia phapen vang chu, Jesu Houbung khat, Pathen khat, Lhagao Theng khat, Tahsan khat, sunga umding dei-a, hinkhom ding, thoh khom ding, kikhel khomding, tahsan khom ding, khat le khat kingailu tah a kihou ding, tiho hi doi a Jesu Houbung khat seh-a kigop ding nop soh kei chu phapen ahi. Ajeh chu, denomination chom chom ho dia van gam chom chom umdeh lou ahi.

### **Pathen henga peh doh**

Soma khat peh, maicham peh, gasoh peh, chule adang ho jeh a Pathen henga sum le pai, thil leh gasoh ho peh hi chonna ngai-a la jong aumin, bol ding dol dana gel jong aume. Hichu hilouva eiman ipa Pathen ingailut jeh-a ipeh ding lom ho suhmil lou chu athupina ahijoi. Mi phabep in, Pathen dia peh kiti hi bol masat sangin ama ding joh agelkhoh masan, mivaicha kahi bou

ve, Pathenin eihe them nante, tia kigela apeh ding lom pelou jong aume. Napeh doh jeh-a naloh doh na hepa chun, nang dia khohsahna ahin nei-a, nahin kithopi tengleh til a sanga nom nasah joh ding aume. Hijeh a hi Pathen henga ipeh ding ho suhmil lou ding ahi. Eima ding gel masa louva akium leh Pathenin eikhoh sah jon, phatthei boh lampi chom chom eipejin, nat le sat aki lhomin, sum chena ding jong ahung lhomin, mi eiki thopi ding jong ahung pung jin ahi. Hichu Pathen thilbol theina kiti chu ahijoi. Hijeh a hi Pathen ichunga alung lhaina ding hagel masat joh ding ahi.

Jesun hao lou ding, nei le gou hao lou ding tiho eina hil pouve. Haona leh gou hi alam dih-a lam ding adei in, chule Pathen lenggam hi koi chungnung tei ding eina hilun, amang ding nei le gou sanga, mang lou ding lhagao lam joh gel masat a khohsah ding atijon ahi (Mt.6:25-33). Chule sum hi setna ahipoi. Ajeh chu sum bei in ichoh nom akicho joupoi. Amabou sum ngailut behsek aphapoi, tihi Paul in eina hilnau ahi (1 Tim.6:9-10). Lamdih louva sum hol ho setnan aloi, ati ahi. Mihao in mivaicha adonlou pa hi adem ahi (Luke 16 a Mihaopa le Lazar thu sim). Muchi thepa thulema Jesun haona kiti hi ling tobang ahi, hichun Pathen thu asunse jie, tihi ahi (Lk. 8:14). Anei agou Pathena pethei mi chu Pathenin ahuhhing nom lou ahi dehpoi. Pathen kinbol le sumhol hi

kop lou ding ahi, tin eihilui (Mt.6:24). Ajeh chu nei le gou ngailutna neihon, Pathen asumil nomun, Pathen doumah abol nomui. Agou in aneipa chu soh in anei jie. Hijeh hin Khasi hon gul ahou lon, kol hon Lakshmi ahou lon, kol sumkol vei hon Ganesh ahou loi. Khangdong mihaopa in Jesu koma tonsot hinna adei dan anasei chun, anei le agou joh angailun Jesu ana dalha tai. Leiset a hao kisa ho hi Pathen henga hao lou ahi jie (Lk.12:16-21).

Hao ngolpa thulem, Lk.12:16-21 sunga hin, aman Pathen min phah louhel “Kei, kei” kiti bou ana minphah ahi. Ahaovin asuh ngola Pathen umna lam heta loupa ahi. Christian hou lamkai ho jong suma kona kichih thei ngai ahi. Mi tampi sumin aminset sah aume. Ven, Jesu le asei juite ho sumchingpa Judas Iscariot chu, sum lama kitup lou mi ahi (Jn.12:6). Old Testament a Pathen in akisah naa chun, mihon aha peh doh valun, ajo jonan pehda tau vin phatante, ana kiti peh un ahi (Exo. 36:2-7). Hijeh hin Pathen dia peh kiti hi hao leh vai in apopon, mihem Pathen dia akipehna in apo Jon ahi.

Jesu houbung kipat tillai in, Jerusalem a christian ho henga ki thopina ana kipei. Antioch mihon ajo chanun ana peuve (Acts 11:27-30). Macedonia a houbung miten amaho vaicha nama jongleu, ana peuvin ahi (2 Cor.8:2-3). Mei thai nun aneicha sun ana pedoh jeng

6 in ahi (Mk.12:41-44). Meithainu thilto Jesun ahet jeng bangin, nang le kei in Pathen dia ipeh doh jat Pathenin ahen ahi. Pakai Jesun ahi na eihoh dia apeh doh jeng leh eihon jong ihinnau ho ama dia i-it lou diu ahi (2 Cor.8:9). Paul in lunglhai sela kipah tah a pedin eitem un, peh ding phamoa peh, it pum puma peh chu Pathen deilam ahipoi (2 Cor.9:6). Lunglhai louva peh chu Pathenin adeilou ahi, pehda phajo ahi. Phat thei bohna isan ding umlou ding ahi.

### **Thi jou hinkho itobang**

Mi khat hi athi jou lim lim, mun ni lah-a khat pen chu alhagao in ajon jie. Jesu kisansa ahileh Van gama achen, Jesu helou ahile Damun a achei (Lk. 16:22-23). Hikom a chun thokitna nikho angah jin ahi. Mithi hi alume, tia kisei ji khu tahsa phe athipa chu ahi. Thokit nikho tengle hiche tahsaphe henga chu lhagao chu hung kit-a kithou doh ding ahi. Thiphat leh lhagao vang athipoi. Tahsa hi in khat tobang ahi, hichu lhagao in adalhah ji ahi (2 Cor.5:1-8).

Amite puikhom dia Jesu hung vah ding ahitai. Hiteng chule lhagao chu tahsa toh hingkit a tahsa thah a thoudoh ding ahi (Jn.11:25, 1 Cor. 15:42-43). Pakai Jesun ama khela koima dang angailut te pui khom dia ahi sollou ding, ama tah hung ding ahi. Ajeh chu atahsante aman angailui (1 Thess.4:16-17). Hi teng chule mi jouse thutanna mai-a

## Nat phalou HIV / AIDS

dinguva achung thu-u Jesun ahintan ding ahi. Tahsan chate anatoh hoiho chu lallukhuh kisan sah ding ahitai (2 Cor.5:9-10). Hiche thutan vaihop jouva hi Jesu amite toh lei-a hung kit ding, chule satan chu kum 1,000 songkul a akhum ding ahi. Jesun lei a alenggam aphu doh-a, kum 1000 vai apoh a, chamna le khantounaa mite dimset diu ahi. Gam ganhing ho jeng jong kidou talouva, kingailu tah a kivop diu ahitai (Rev.20:4, Isa. 11:6, Isa. 35:1-10).

Hiche kum 1000 jou teng chule Satan chu songkul a kona kila doh-a, mei kouna muna (damun meidila) kisep lut ding ahi. Chujou va, Jesu tahan manlou mithi ho jou se hung thoudoh diu, achung thu-u kitan ding ahi. Jesu sochatna ana kisan lou jouse chu, satan lhunna dia kisem Damun meidil a kisep lut diu ahitai (Rev. 20:11-15).

Pathen tahanjane jouse, Pathen cha hiuva, van gama atonsot a dia sungha diu ahitai. Pakai a kona sochatna mulou jouse chu, atonsot a dia Pathen toh kikhen diu ahitai. "Amaho hi tantih neilou talen man dia cheuva, midih ho vang tonsot hinnaa lut diu ahi" (Mt. 25:46). Tua Van gam le Damun kikhehna hethei louho chun hiche nikho le chun ki chen tah-a amu diu ahin, thutan ni kho jou le kisih jong phachom talou ahi. Icko nung hinkho lampi, tu ihin pet uhin kisuhchet utin, thupi kitan ding ging poute. Kging phaute.

Nahet manlou kah a HIV - AIDS hi nana kilah thei ahi. Noise hih in. Ching thei in, kging phanlang hin. Nungah theng tampi lunglhai sel a ajinei jouleh hiche nat hi avei jin, ama jeh hilou akichen pipa jeh ana hikha atame. Chutobangma chun pasal gollhang theng hon jong ajinu a konin akilah thei ui. Mi akivet leh atahsa phasel sul, asung lama nat-hi nei, polam mit vet-a kipum het thei lou ahi jie. Hiche nat hi asuh damna lou umlou lai ahi. Avei vei chu, lou aneh jeh-a kihedoh lou, ahivanga nat chun ahintha tei tei ji ahi.

Nulepa kitimatna a kon, lou injection a kon, nat hi ajaona thisan kipeh toa kon, nulenu palepa kitimat na (homosexual) a kon adeh in, ahi jie. Nupi natvei in acha apen teng anat apeson thei-e. Ikichenpi ding khat iginmoa ahileh *check* kibolsah ding apha pene. Hichena dia adaleh kichenpi louva phajo ahi.

## Kichamna hi kipana

Pakai Jesun, namelma teu ngailuvin, nabolse teu taopeh un, tin ana sei-e (Mt.5:44). Melmate ngai lut-a, eibolsete ho taopeh hi asei abai lam jinan, mi hilna lama jong akithem in, ahivangin aphant le anikho, amunin eihin phah tengle hiche hi akimang nom ji tapoi. Eima sanga neijou te, seithei boltheite chunga ngailutna le taopehna vang abailam jinai, ahinla

eima sanga mimo migenthei mi vai cha, mi imuda ho chunga vang aki mang nom jitapoi. Pakai thupeh ho nit jouna din, ngailutna tahbeh nei angai in ahi. Ngailutna jong hi aneitho leh ahet tho achom chom ahi. David in aneithoi. Ama nikho lai a Mose dan thupeh kinit ahin, kiphu lah ding, mit khela mit, ha khela ha kiti lai ahi (Leviti. 24:20). David chun hiche danthu hi ana mangcha poi (Mt.5 : 38).

David chu achapa Absalom in tha dia adel lele laitah in, aka pum pumin Olive mol adel delin ahileh Saul insung mi Shimei ahung pot doh in, David chu songin asep sep in, agaosap khum peh in, chemang loi in pannabei thisan so hatpa, Saul insung mi thisan nachunga lhung hen. Nalenggam jong nachapa Absalom achang tai, tin asam samin ahi. Sepai lamkaipu Joab in, gathat doh tangem khuche uicha thisa'n nahap hap khu ipi dia nangai ngai ham, ati. Ahinla David in, limsah datan Pathenin ei gaosap dia ahinsol himai inte, atitai (2 Sam.16:6). Absalomin apa David tha dia hadela adel lai chun, Pathenin ajang samin anamanin thinga akhai in, chuin Joab in amun agathat tai.

David in achapa Absalom thi ahet chun an ngola aka ka chun, Joab in David henga, na sepaite le keiho thigam hel unglang, nachapa chu hing jole nalung lhajio ding ham, tin agaphoh-e (2 Sam.16:14). David chun lungmonga inlam ahin jot phat in, Jordan gala Shimei mipha loupan,

David ana lamton ahile Abishai in, amu doh in, David henga, khuche mi pha loupa khu gathat doh tange anatin, ahin la David in, tha angai poi, ajeh chu Pakai in Israel lenga eipan sah kit ahi tai, ati (2 Sam.19:21). David thoh hat na leh ami ngaidamma hi kihilna phatah ahi. Kiphulah, kilethuh kiti ho ama lung a aumpoi, Pathen ging mi ahi.

Saul in David thatei anagoi. Tengchan nivei ana khon, songko sung a adellut in, chule Saul lengpa tha theina din Pathenin David chu phat anapen, ahivangin David in, Pathen thao nusa chunga kakhut lha ponge, ati (1 Sam. 26:9). David lunggel chunga Pathen ana lunglhai lheh-e.

Solchah Paul in thohhat ding, nun nem ding, mi ngaidam ding thu anasei-e. Kiphulah hi hun, Pathen lung hanna thei chu ottoh jouvin, ajeh chu Pakai in kiphulah hi keima kin ahi, kei man lethuh nange, tin akisune, anati. Namelma teu agil akelle an nehsah un lang adang achah ule twi donsah un anati joi (Rom. 12:19-20).

Jesun taona thudol ahilnaa, ka leiba teu kangaidam bangun keiho bat jong ngaidamin, ati (Mt.6:12). Sum le pai, nei le gou eibaho ngaidam jou ding, eibolse ho, inei igou chom ho, ei deng ho, inle lou eisuhset peh ho, ingai dam jou diuva Pakai in, eihilu ahi. Pakai in jong abolsete ana ngaidame. Hito bang hohi itokhah tengule Jesun eihil nau ho anakihe dohji tapoi. David vang in mit khela mit ha khela ha, kiti danthu

ana umjong le ajui pon, mi angaidam joi. Jesun, kaleiba teu kangaidam bangun, keihobat jong ngaidamin, ti eina hilui. Ngaidam masatna nei lou akihile Pathenin eingaidam thei lou ahi. Ngaidamna neilou mi chu Pathen koma tao jongle Pathenin ahe kelkul in, ataona jong asan lou ding ahi jitai.

Pakai Jesun eiho chonset angaidam seh hilouvin, ithoh khelun athoh in, thihi khelun athin anahi. Mi ngaidam hi abai jepnan, ahinla mi chonse khat thina khela thi vang hahsa tah ahi. Jesu nungui ihiule mi ingaidam uva, eiho jong khat le khat iki ngaidam diu ngai ahi. Tulai eiho christian te lah a chonna dana kigap kileusah kitihobolui. Bible ijui diu ha, custom ijui joh diu hitam, ngaito khamset ahi. Mose danthu ijui diu ha, Jesu danthu ijui diu hitam? Na chunga thilse ahung lhun masangin, angaidam din kigasan umin, chutile najo jou ding ahi. Pathenin iseui doh kham khamu phatthei bohta hen!

(Rev. Seikhollen)

## Lung gila Pathen hou

Rom. bung 1-11 sunga hin Paulin chitün namtin Adam le Eve a peng chonse ahisoh kei un, Pakai Jesu tahsan jala Pathenin them achan sah-a, Lhagao apeh ahitai, ati. Hijeh a chu lung laigila cheng Pathen Lhagao a Pathen houdol Rom. bung 12 a pat aseipan anahi. Lhagao hinkho kisem phatna dinga

Rome lekhabu hi phatea sim angai monge.

1. *Lhagao umpi christiante* : Lhagao chenpha christiante hinkho loupi ahi (Rom.12:1-8). Lhagao a hindan aseinaa hin, tahsa le lhagao aseikhen hi phatecha hetkhen aphai. Greek ten tahsa hi aphamo monga agelnau leh christian ten tahsa le lhagao agom a Lhagao chenpha ahina, apumpia Pathen houna ding ahidan hetthem dingin aphai.

Pakai Jesu tahsan jeh a Pathenin themchang ahisah-a chule Pathen lhagao achenpha sah christian jouse chu pumkhat ahi tauvin, imacha chan akhen thei lou dia aphon doh ahitai (Rom.8:37-39). Chule Rom.12:3-8 sunga hi mihem Pathen Lhagao apeh hon, Lhagao akipeh chu itobang bol theina Lhagao ahi akihet thema, akipe lhagao jala chu akin akibol cheh ding ahi. Tipum khat-a tibah chom cheh ho chu appannau chom cheh ahinai, 1 Cor.12:12-31 sunga ahil chetna toh kibang ahi.

2. *Lhagao chenpi kimudohna* : Christa jala Pathen Lhagao chenna hinkhoa kimu doh thei ahi. Rom. 12:9-13 sunga Paul in Lhagao chenpha miho niseh hinkhoa kilang doh masapen chu tepi beihela ‘ngailut’ ahiloule lungsetna ahisah in, thilse poupou hot ding, sopi ngailutna nei a, thahatna kilandoh sah jing ding ahi. Christian te din lungset na hi thupi tah ahi, manchah ding ahi.

Pontho tah-a pan ding, tha nom tah-a na toh-a, genthei hesoh kithopia, imasanga tohthei umjouse, ithan ajochan toh ding, thalo man gelkhoh lou ding, tohlu akhoh jeh a toh ding, imaiphah chan toh pha jouse toh ding ahi. Hongphal tah-a angaicha ho peh-a, kinem tah a taona jala Pathen koma sei-a, hah satna thohhat ding, lhadah lou-a Pathen dei ahi poule thipi ding hijong le toh ngai ahi.

3. *Lei-a Lhagaova hin* : Vanno leiiset hinkho ahah cheh cheh tan, Lhagaova hinkho manhi boipi umtah ahitai. Min ibolsetna chu phatthei boh joh-a, akipahte kipa pia, akapte kapi ding, kinel louva lungkhat hijing ding, kiletsah louva aneojo ding ki chu tho ding, kichih sah sanga Pathen chihna joh kisonpi dia asei ho Rom.12:17-21 sunga asei ho gei-a toh doh ding hi Lhagao hinkho chu ahi.

Paul in ‘lunggila’ Pathen hou ding asei hi, Pakai Jesun Pathen houna ding Ama Lhagao ahidol asei hitoh akitomona ding aumpoi (John 4:24). Ajeh chu Pathen ‘hou’ kiti hi doi-a kithoi tobang ahipon, Pathen koma ingaichat kisei Aman pha ati banga abol tei ding tahsan ding joh ahi. Achaina kei-a Paul in asei chu, ‘Setna kijosah louvin, setna chu phat nan jou jovid’ (Rom.12:21) ati hi Lhagao chenpha tilou tahsaphe mai-a hing ho jochi ahipoi. Lhagao a hing hon ajo teina dia Pathenin Lhagao apeh-a, achenpha ho koma

Paul in asei ahi. ‘Gankihing lha bang a itahsau pumpi Lhagao chenpha, Pathen dei bou boldia ni seh a toh ding eisei peh-u, Lhagao thua ihinu ajeh hi tonsot hinnaa galkai tei dia ikinepnau jeh ahi.

(Dr. T. Lunkim)

## Nui-hi, damna (Prov.17:22)

\* Uicha khat athin, aneipan angailu behsek in, Pastor pa koma ‘ka uicha athin, kavui nomin nangin thi lhahna ho neibol peh in’ tin agasei-e. Pastor pan, ‘Hou-in sunga thi lhahna ken uicha din kabol ngaipoi, khukoma khun houbung khat aumin, amaho khu gakidoh tan’ tin adonbut-e. Ui neipa chun Pastor pa henga, “Ama ho pastor pa chun, kei-a kona kipaman lakh khat akilah nomna dem” tin ana dong kit-e. Hichu ajah jah in, Pastor pa chu anatao in, “Vo, Pathen, uicha chu christian ahi tia idia neina hetsah louva ham!” ati.

\* *Chapa’ n’ apa koma - hepa*, idia nalua nasam themkhat kaang ham? *Apan* - Nangin kalung hilouna khat nabol tengle kasam khat khat akang doh jie.

*Achapan* - Chuti chu ahile, kapu sam jouse ipi dia kangsoh hitam, ka he tai, kahedoh tai, anati.

\* Ojapi khat hin school khat a class alah masat pen nin, chapang ho henga - ‘Nangho lah-a angolpen ho dingun’ atile chapang khat ahung dinge. “Idia nadin ham” tia adoh leh, “Nang chang seh nadin chu, anom poi, tia kahin dinkhompi nahi” anati.

**Het-a phachom ho**

**11**

\* Delhi IIT student mi nin, numei te dinmunna jun thahna thei ding a ngaito doh lhon tai. Ajun thah ding tngle touna thei muntheng aholu hung ngaita lou ding ahi.

\* Tukum 2019 February lha a hin, 4 sundays, 4 mondays, 4 tuesdays, 4 wednesday, 4 thursdays, 4 fridays, 4 saturdays aume. Hiche hi kidang kisa tei inte.

\* 2017 kichai chun India a HIV nat nei mi 21.40 lakh ana ume. Maharashtra a atam penin, chule 2017 kuma AIDS nat in atha mi sang 69.11 ana lhinge. North East India a HIV nat vei mi Mizoram a atam penin, aban in Manipur, le Nagaland ahi.

\* Space X kiti te seidan ahile van chung lama gamve din, mi ni ni kisol doh pan thei tante atiuve. A bhara vang taminte. Boeing ten jong van chunga tourist solna ding angaito laitah-u ahi.

\* Missionary nupa khat Katra a Missionary din ana lhung in ahile amanin sum 40 bep anei lhone. An chang themkhat anei lhonin, hon ding ati lhon leh Kerosene a hai-a aumpoi. Alung don manin Pathen henga atao lhonin, hai chu alolhon leh an honna kham Kerosene ahung longlhai. Ajingin jong atao masa lhonin hai chu alolhon kit leh thao amanchah kham ahung um jitan ahi. Hiti chun nikho 12 bu ana kihon thei

lhon tai. Ni 13 ni chun mi khat in M.O. ahin that amulhonin, hiche kalse chun thaotui chu ahung potdoh tapoi.

Pathen oi umlou laina mun ahin, amani chu khomi ten ana veta kei un ahi. Nikhat a-in heng ten cha don din akou lhonin, kidang satah in anache lhone. Chabel a chu twi omta louva, ajun joh a-ompeh lhon anahi khai. Inneite apau chun cha kahin dop ding ahitai, atin jun kiom cha chu khona sunding agot lai tah in, chabel chu apohkeh jengin, inneipa chu ama junin achap kot deh in anahi. Jun kot dehduh pumin ahung doh in amani henga, “Na Pathen lhonin nahuhdoh lhon ahitai, na Pathen hi Pathen dih tah ahi monge” atin, athilbol dihlou chu asei in, ngai dam ana kithume.

\* 2019 kuma nikho thupi ho :  
- Palm Sunday ... April 14  
- Good Friday ... April 19  
- Mother's Day ... May 12  
- Pentecost Sunday ... June 9  
- Father's Day ... June 16

\* Alexander the Great in ana phu doh khopi min hi Alexandria ahi.

\* Taj Mahal hi A.D. 1630 chun ana kisai.

\* Zimbabwe min hi tillai chun Rhodesia anahi.

\* Potamology kiti sappao thucheng hin ‘study of rivers’ atina ahi.

\* Vanoi leiset gam (country) ho lah a alenpen hi Russia ahi.

\* Ahpi khat in ahinkho sungin ahtui 300 gei ape jouvin ahi.

**12**

*Christian Meivah* - sim te taona akiman peh jinge. Sumto kuma Rs. 100/- ahin, asim nom hon hin peuyin, sum napeh lhaa kona kum nakisim peh ahi. M.O. hin that hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahlen Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukhola, Kangpokpi Missn
- 6) Mrs. Veikholam, Ideal school, ccpur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.
- 9) Mr. Kapcha Singsit, Dimapur.

**Het-a phachom ho**

\* Antartica kiti gama hin gul khat cha aumpoi ... Mihem ahin kum saopen hi Methuselah ahin, ahin kum 969 ahi, ... Kum 1910 chun China a nungah khat le gol lhang khat ana kicheng in, gol lhangpa kum 9 ahin, numeinu kum 8 ahi bep-e, ... Taj Mahal chunga len na akilen sahpoi.

\* Christian Meivah thuso lahna man Bank a hinhot nom hon hia hinhot un, chule namin le nasum that jat chu Editor pa henga SMS or phone in hin hetsah tauvin :

M. Haokhonthong, Bank of India,  
Branch - Khanapara, Guwahati.  
S/B/A/c. No. 500910110000191  
IFSC Code BKID 0005009

*Editor :*

Rev. M. Haokhonthong,  
C/o, Tingjanem Manchong  
Nichols Higher Secondary School, Satribari,  
P.O. Rehabari -781008, Guwahati, Assam.